



PAUL FLORA: AUF IN DEN KAMPF – CARTOONS, EDIZIUN DTV 1972

Il med è il messadi

Rescuverta d'in filosof profetic

DA BENEDETTO VIGNE

■ **The medium is the message – Il med è il messadi. Cun quel slogan aveva il filosof american Marshall McLuhan (1911–1980) gi lantschà ina gronda discussiun ils onns sessanta, propagond sias tesas revoluziunarias en divers cudeschs ch'èn lura daventads bestsellers da la èra sessantotgarda. In da quels purtava il titel «Understanding Media» («Die magischen Kanäle»).** Grosso modo pretendia il filosof che las grondas midadas istoricas e socialas na capitian betg tras ils cuntegns, mabain tars l'essenza dal med sez. La viafier n'haja per exempel betg purtà simplamain moviment u transport a l'umanità, mabain ina nova structura da citads e novas furmas da lavur e temp liber. La stampa dal cudesch haja gidà surventscher la vischnanca tribala dal temp medieval e promovì il naziunalissem. La maschina da scriber haja – tras l'introducziun da stenotipistas bain vestgidas – gi in'influenza sin la moda feminina dal ventgavel tschientaner.

En singuls chapitels expectorescha Marshall McLuhan l'essenza e l'effect da meds sco: il pled discuri, il pled scrit, las vias, la cifra, il daner, las uras, la fotografia, la pressa, l'auto, il telefon, il kino, il

radio, la televisiun. L'ultim chapitel è deditgà a l'automaziun – el anticipescha il computer ch'era al temp da la redacziun da ses cudesch (1964) betg anc entrà en il conscient general. Propi profeticas sa legian là construcziuns sco: «Cun l'automatisaziun vegnan betg mo a svanir professiuns ed a resurgir rollas integralas... causa a la disponibilitad immediata dad infurmaziun... En il futur consista la lavur betg pli en gudagnar il paun da mingtadi, mabain en emprender da viver en la èra da l'automatisaziun.»

Ultra da quai introducescha McLuhan las noziuns da «meds chauds» e «meds fraids». Tenor el dumondan «meds fraids» dapli ils senns da l'uman – perquai ch'els cuntegnan main infurmaziun – entant che quels «chauds» als escludan. Chaud è per exempel il radio, froid il telefon. Chaud il kino, fraida la televisiun. Chauda la fotografia, fraida la caricatura. Interessant fissi da savair en tge categoria che Marshall McLuhan inseriss ils meds da noss dis, il computer u il telefonin. Probabel savess el identifitgar il smartphone cun sias extensiuns autoinscenatoricas sco la ragisch dal nov populissem dal ventgavel tschientaner.

L'autur è chantautur